

Fasnacht 2019



*M*ir zwai – mir sin zwai Pfadibuebe und sin allzyt bereit
und mir vollbringe alli Daag e gueti Tat zu zwait
E Hammer und e Waageheber hüen mir jetz midfiere
No könne mir – bi de BVB-Büs – neu! Pneu montiere

*D*r Johann Schneider Ammann hett – wieder Zyt für anderi Sache
Und dèèrf drum jede Midaag – e Midaagschleeffli mache
Stimme duet är – jetz nur no briefflich – und; nadyrlig au weele
Will in sim Alter – d'Sympathie – zu dr Urne ganz duet feele

*S*in sie Singel und hän kai Frau – das nimmt uns grad kli mid
Hän sie gwüst dass es im IKEA – e Leesig für das gid
Stöön sie zwüsche d'Meebel yine – am beschte grad elai
Will deert nämme – d'Fraue maischtens jede Saich mit hei

E basler Schugger sait zu Tesla – «hei das isch famos»
Mit Sproochstyryig «faar uns in Yisatz – diräggt an Zürcherstroos»
Mach d'Fliegeldiire – uff und nimm – uns denn au no mid
No sait dä Tesla – «Ziel unbekannt – s'Wort Züri kenn i nid»

*D*o letschti bin i in d'Ferie – mit Kollege – ganz wyt wäg
Luxus Hotel, Partynächt – alles sauber – niene Drägg
S'Ässe isch – e Wucht und dr Wyy – fliesst us grosse Karaffe
I finds aifach toll dass i – bi dr schwyzer Boscht deerf schaffe

*D*r Donald lüttet em Ueli a – «Hello, listen to me»
«Kumm zu mir nach Amerika – denn bisch au du derbi»
«Was muess ich dänn deet so mache?» – duet dr Ueli in Hörer huuche
«An dr mexikanische Gränze unde – könnt in di als Muurer bruche»

*Z*viel Plastik gitts im Ozean s'isch nid z'übersee
Und wenn das e Fischli frisst – duet das däm denn wee
D'Leesig isch – doch wunderbar – mir hoffe das es nützt
D'Adela hett – all dä Plastik – in ihre Kèerper gsprützt

*W*as lauft mit dir uns wie duesch – luege us em Fuetter
Wotsch Box in Buch oder machsch's mit dinere Muetter
Das tönt jetz nach – Uslandsläng – sehr verstörend wirgligg krass
Das isch's gepfleggt – Baseldyytsch – z'Glaihinige in dr Klass

*W*otsch italiänisch oder thai – oder e Filet schlemme
Oder wotsch digg go ässe – denn muesch zum Stucki renne
Oder wotsch – e Sandwich mit – nur aim Salaatblatt kaue
Denn muesch halt – zum FCB – in d'Mannschaft vo de Fraue

E Sensation im Atlantik – hett e Forscher gfunde
E Waalfisch hett sich e rosa Schleife uff e Rugge bunde
Me hett sogar – e warmi Strömig – kenne Mässe, s'isch verruggt
Dä Waalfisch hed – woorschinligg zum z'Morge – dr Kübelböck verschluggt

Wotsch au by uns bänggle?
Uff www.vsg-basel.ch erfahrsch meh!

